



放紙鷂

幾下日前縣政府舉辦放紙鷂活動，會場裡肚看得著盡多現代化个紙鷂。佢等係用印等靚靚圖畫个塑膠布、幾支「卡榜」个骨架做个，再加花蘿嗶嘑長長个尾。透明个牽魚線綁等紙鷂，飛在天頂項盡好看。放紙鷂个細人仔，帶等笑容在該一哪仔走上走下，該暢樂个心情一息都無輸俚等還細放紙鷂个時節。

四十零年前，哪有人用塑膠布同「卡榜」來做紙鷂？係愛搞紙鷂，細人仔聚概都係用過期个報紙同竹篾仔來做。該下在草地仔个人家，每家人多少都會有門簾。一領六七尺長个門簾項，少講也有百過支个竹篾仔，係對門簾項下下(ha` ha`)兩支來做紙鷂个骨架，再同該縫仔勻勻啊，麼人都看毋出有哪爭差。除核竹篾，還需要一張半个報紙來做圓身同尾。

佢會先同報紙對角折出一個正四角形，再用揚尾刀仔同佢割下來做紙鷂个圓身。有地圓身，就知得愛有幾長个骨架。骨架一支係長條个、一支拗做弓形，佢會用線來綑紮該弓形个骨。弓項个弦同放紙鷂个線，係對阿姆个裁縫車項拖仔「借」出來用个。將骨架放好，再用報紙裁出六張細張个紙，用粳膏好，就同佢等在紙鷂个圓身固定等。最後再裁剪出細細長長个尾，該尾做得接做幾長就幾長。毋過佢還會在弓个兩臂部位各接一條鬚，恁仔，等到紙鷂飛上天去，就看得著佢有四條擺啊擺个尾，盡錫人看。

佢盡好自家去放紙鷂仔，在佢屋背就有一大片个洋田。還細時節在割禾收成過後，佢會拿等紙鷂在該等起風。該風吹啊來，佢緊走緊放線，一下仔就做得同紙鷂放上天。等佢在天頂飛該下，佢會掣一下線再放一段線，再掣一下線放一下線，分紙鷂緊飛緊高、緊飛緊高。有時節看佢飛高高，在天頂項看起來就伸著一細點仔定定，佢蓋像係飛啊盡遠、盡遠个所在。佢時常會看啊呆核，覺著自家就係紙鷂，乜共樣飛啊盡遠这个世界。

有一擺田坵正蒔過禾，洋田一哪仔都蔭等水，正蒔下去个秧仔叮叮企等。佢同叔伯阿哥各人做一隻紙鷂，洋田無好分佢等搞寮，就拿去火車路臂放。在該無麼个風个下晝，佢等同紙鷂放在火車路臂，線乜先牽好。等到火車來，佢撲起一陣風，黏時就同紙鷂抛上天。通常佢等放紙鷂係比看麼人个紙鷂飛過高，該擺阿哥毋知哪學來个？佢同厥紙鷂操作啊偏來竄去，無幾久厥紙鷂个線就同吾个纏共下。尾下佢掣一下厥紙鷂，猴咧！佢同佢个線剪斷地！

佢看等自家个紙鷂緊飛緊遠，對天頂消失。本本牽等紙鷂个棉線，跔等就軟下跌落禾田。該原旦係白白个棉線，搵著田坵水一下就變烏，毋知愛仰仔來「還」阿姆。佢又驚又譴，緊縈線緊噉、緊噉緊罵佢。掠尾，等線收好，佢看等歸團落溼个線，這下看愛仰仔同阿姆交代？又惱又譴之下，佢趕佢無注意个時節走過去，一下手扳就同厥線掣斷核。這下換佢好愁咧，佢黏時就報一個冤仇。

該已經係幾十年前个事，今下看等紙鷂飛高高，後生時節个夢想還飛高高，幸福早就搭纏纏咧。

作者：陳志寧

☆詞彙學習☆

【卡榜】ka` bong`：碳纖維材質。

【揚尾刀仔】iong` mi` do` e`：美工小刀。

【花蘿嗶嘑】fa` lo` bid bog：色彩斑斕。

【抛上天】iai` song` tien`：迅速的飛上天。

【牽魚線】kian` ng` xien：透明的釣魚線。

【偏來竄去】pien` loi` fe` hi：歪來歪去。

【聚概】qiug` koi`：大部分。

【掣斷】dui` ton`：扯斷。

【草地仔】co` ti` e`：泛指鄉下地區。